

Ikiaroornartunik sakkortuunik eqqusseriartunut, tuniniaasunullu pineqaatissiisarnerup sakkortunerulernissaa pillugu Naalakkersuisut 2023 naatinnagu Naalagaaffimmut saaffiginnissuteqarnissaannik Inatsisartut aalajangiiffigisassaattut siunnersuut.

(Inatsisartuni Aqqalu C. Jerimiassen, Atassut)

Akissuteqaat

(Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Aappassaaneerneqarnera

Inatsisartut aalajangiiffigisassaattut siunnersummut matumunnga peqqissaartumik suliarinnissimanerannut Inatsisinut Ataatsimiitaliaq Naalakkersuisut qutsavigiumavaat.

Inatsisartut inatsisaat nutaajummat, uagut nunatsinni ikiaroornartunut akuersaanngilluinnarnerput, aamma taakku pilligit suliani sakkortuumik qisuariartoqartariaqarneranik kissaatiginninnerput pillugu naalagaaffimmi oqartussanut saaffiginninnissamut siunnersuutip Naalakkersuisut iluatinnartumik periarfissippai.

2023-imi ataatsimiitaliap isumaliutissiisummik naammassinnissimannginera tunuliaqtaralugu, allannguutissatut siunnersummmik saqqummiusseqqullugit Inatsisinik Ataatsimiitaliap Naalakkersuisut kajumissaarsimavai.

Taamaammat Naalakkersuisut allannguutissatut siunnersuut tulliuttoq saqqummiuppaat:

"Ikiaroornartunik sakkortuunik eqqusseriartunut, tuniniaasunullu pineqaatissiisarnerup sakkortunerulernissaa pillugu Naalakkersuisut 2024 naatinnagu Naalagaaffimmut saaffiginnissuteqarnissaannik Inatsisartut aalajangiiffigisassaattut siunnersuut."

Taamatut oqaaseqarlutik amerlanerusunillu oqaaseqaratik siunnersuut aappassaaneerneqarnissaanut Naalakkersuisut tunniuppaat.